

1511 rantur, milites prope universi, qui disiecti apud Bononiam a Bentivolorum factione vel capti fuerant, singulatim ad Paulum inermes venerunt, centurionesque illorum militum omnes, quorum nonnullos interfectos fuisse rumor attulerat. eos Paulus, ut ad se navigia appellerant, impositos ad Albanum montem mittebat: is est locus in primis Patavinorum a Fossa Clodia finibus. Ipse autem Paulus, universo exercitu præmisso, triremem instructiorem e classe Bondimeriana ad se præter alias missam conscendit, & me, qui casu tunc ad eundem vicum Urbino veneram, ut Bembum patrem meum adversa valetudine Patavii laborantem inviserem, latissima unius diei navigatione Fossam Clodiam secum vexit. Is fuit dies ad octavum calend. julias. Paulus ad Patres se contulit, atque ab iis missionem postulans, ea non impetrata ad Leonicanos, ubi erat Grittus, est profectus. Patres exercitu reficiendo consulentes, Mariano Prato, Leonardi illius quem Galli hostes interfecerant, fratris filio, tribunatum quingentorum militum concesserunt, atque ut eum numerum quamprimum conficeret, ad Grittumque legatum adduceret, mandaverunt. Erant Veronæ milites Hispani mille. ii oppido egressi ad Grittum miserunt, quoniam nullius tunc hominum stipendia mereant, si legatus velit, se ad illum venturos stipendiaque reipublicæ facturos. Ea de re Patres admoniti, coacto Senatu cum plures sententiæ dicerentur, ea vicit, quæ non esse eis confidendum censuit: itaque non sunt recepti. Julius Romam rediens in itinere edictum in Bononienses protulit, ni ad se remquepublicam Romanam revertantur, se se eos ab aqua & igni, a sacrorum communione, a convictu hominum diris imprecationibus arcere. Cumque post eos dies acta e nubibus grando solito major atque frequentior, omnes terræ fructus, qui in agris erant, per X. millia passuum circa oppidum abstulisset, vulgi suspicio tenuit, edicti Juliani causa eam conflatam vastitatem cælo missam cecidisse.

Eo tempore e Pannonia literæ venerunt: in conventu regio,

*III. kal.
jul. Julius
Bononiensis
bus aqua &
igni interdixit.*